

清
代
筆
叢
刊
記

島居隨錄

盧若騰著

全

卷之五

五

五

盧若騰著

○島
居
隨
錄

序

有明貞臣曰盧巡撫牧洲先生遭時標季卓然以文章氣節與閩士相砥礪士林至今重之讀其書益復哀其志悲其遇而想見其為人也林子瘦雲侔儻而嗜古得先生島居隨錄寶同拱璧顧不欲私為枕祕將以壽諸梨棗竊聞先生著書等身乃文集僅有存者又聞其留菴值筆二卷甚佳皆經史及諸子中心得之語應尚在人間是書亦頗佚其後半它日若獲裒成全集以饜學者之心斯則瘦雲之上願也是書似專為格物而作夫不物於物所以物物蓋將自元會運世言之寅開而戌開始於乾品物流形訖於未濟辨物居方也自蠢假緇終言之卯開而卯閉和同不可以內一南而物生始肅不可以羸一壯而物成也孳子紐丑亥以二首法乾元坤元六身象六子陰陽闔闢互為其根薺成告甘荼成告苦敦實豆實珍若天賜至焉諸橫生盡以養縱生諸縱生盡以養一丈夫夫然故物理可得而推人極可得而立也且物生而有象象而滋滋而數數不可窮也名以命之類以從之探網緼之原通消息之故博繁蹟之彙極蟲沙之變然則是書雖連牂無傷也劇於目牀於心驚猶鬼神其言若河漢而無涯也其間珠連繩貫似有脈絡分別部居似有次第今皆不敢妄為

附會獨計先生當顛覆流離之際憤時事不可為欲以澎湖作田橫之島自託殷頑
日與波臣為伍所見皆蠻煙瘴雨鮫人蜃舍可驚可愕之狀羈孤冢冥傾跌至八九
不悔而猶抱遺編究終始非直比張華之博物齊諧夷堅之志怪也其離騷天問之
思乎

道光辛卯至日汀歸化後學羅聯棠序

島居隨錄目次

卷上

物生

物交

生化

應求

卷下

制伏

反殊

偏特

物宜

徇異

比類

道光丁亥鄉人吳君體士贈樹梅以鄉先賢盧牧洲先生島居隨錄稿本二冊靈

粉剝落逸去比類一門辛卯冬屬傳君醇儒訪於盧君逢時遂得完璧正訛補闕
亟付梓人經始於是歲十二月越明年九秋書成逢時牧洲先生之姪孫也

島居隨錄卷上

清 同安盧若騰著

物生

計然曰。人受命於天地變化而生。一月而膏。二月而脉。三月而胚。謂如水泡之狀。四月而胎。謂如水中蝦蟆胎也。五月而筋。六月而骨。謂血氣變為肉。肉為脂。脂為骨也。七月而生形。八月而動。九月而躁。十月而生。

陳楚之間。凡人獸乳而雙產。謂之釐孳。秦晉之間曰健子。趙魏之間曰孳生。

孳生有隔日隔月者。殷祖甲以卯日生。囂已日生。良嘉靖初。京師民米鑑妻。二月十一日生一子。十二日生一子。十三日生一子。萬歷年間。工部范鈺妻生一女。四閱月矣。又生一男。

人有不及十月而生者。魏略云。黃牛羗人。孕六月而生。博物志云。荊州極西南界至蜀諸民曰獠子。婦人妊娠七月而產。今人孕七月八月生者。常有之。七月者多可育。八月者多難育。七變而八不變也。宋濂七月生。

人有過十月而生者。伏羲母孕十二年生。黃帝母孕二十四月生。堯契禹及漢昭帝

母皆孕十四月生。又漢武帝內傳云。王夫人孕十四月而生武帝。晉書云。符堅母孕十二月生。十六國春秋。劉淵母孕十五月生。劉聰母亦孕十五月生。慕容垂母孕十三月生。李雄十四月生。前涼錄。索綏云。老子母懷孕十年乃生。老子傳又云。胎八十一年乃生。太平廣記。葉法善十五月生。博物志云。大人國其人孕三十六年。生而白頭。唐李泌母周氏懷孕三年生泌。泌始生。髮即至眉。宋供奉官郭坦母孕二十二月生萬歷年間。中書馬呈德。大同人。其妻孕八歲而生子。子亦不甚大。但髮長尺。張舜民畫墁錄云。鳳翔婦與黃冠通姦。即妊不能決。在禁中四年。至英廟登極赦到。宣竟而婦生子。髮被面。齒滿口。余未之信。至岐下取案文閱之。不悞。異苑云。太原溫磬石母懷身三年。然後生。墜地便坐而笑。髮覆面。牙齒皆具。宋林靈素。永嘉人。母孕二十四月而生。

人有不因交合而孕者。太昊母華胥履巨人跡。意有所動。青虹繞之。遂因而孕。黃帝母附寶見大雷光繞北斗樞星。照於郊野。感之而孕。少昊母女節見大星如虹下流華渚。感之而孕。顓頊母女樞見瑤光貫月。感之而孕。帝嚳次妃慶都感赤龍之精。孕堯帝。嚳元妃姜嫄出野。見巨人跡。心忻然悅而踐之。身動如孕。期而生。援帝嚳三妃

簡狄祈於高禖。見玄鳥墜卵吞之。孕契。瞽瞍妻握登。感大虹而孕舜。一云感樞星之精而孕禹。母修已。一曰女狄。山行見流星貫昴。意感慄然。又於石紐山下泉中得月精如雞子。愛而吞之。遂孕。湯母扶都。感白氣貫月而孕。老聃母嬰數。見日精下落如流星。飛入口中而孕。周昭王夫人觀白虹而有娠。生子兩手握拳不開。昭王嘆之。即開左手有文曰公。右手有文曰羽。遂賜姓翁氏。食采翁山。古哀牢國。卽今雲南永昌軍民府也。相傳一婦名沙壺。浣絮水中。觸沉木有感。因孕。產九男。其季子長而黠。遂推為酋長。魏書云。鮮卑兵投鹿候。從匈奴三年。其妻在家有子。怪而殺之。妻言嘗行仰天視。雨雹入口吞之而生子。號檀石槐。後遂為鮮卑大人。梁王曇逸母晝寢。夢靈鳳集其身。因有娠。梁任昉母裴氏。夢五色綵旗。四角繫金鈴。墜鈴於懷中。覺而有孕。徐陵母臧氏。夢五色雲化為鳳。集其肩左。因而有孕。隋王通母銅川夫人。經山梁履巨石而有孕。遂生文中子。漢末零陵郡太守。有女悅。門下書佐。令婢取其盥手水飲之。而有娠。既而生子能行。太守抱兒使求其父。兒直上書佐膝上。書佐推之。兒仆地化為水。桓玄母馬氏。見流星墜銅水甕中。如火珠。取入瓢吞之。有感而孕。後遂生玄。宋邵雍母李氏。因山行於雲霞間。見大黑猿。有感遂孕。南史。東海有女國。二三月競

入水則妊娠。六七月產子。女人胸前無乳。頂後生毛。根白。毛中有汁。以乳子。百日能行。三四年則成人矣。北史竇泰之母。夢風雷而有娠。朝鮮靈巖郡西有崔氏園。諺傳新羅人崔氏園中有瓜。長尺餘。一家頗異之。崔氏女潛摘食之。款然有孕。彌月生子。其父母惡其無人道而生。置之竹林。居數日。女往視之。鳩燕來覆翼之。還告於父母。父母往見異之。取而養之。及長。為僧。名道詵。入唐傳一行地理法而還。後名其地曰鳩林。順慶府達州鷺鷥山有井。井側有巨人足跡。有女子履其跡而孕。生一子。棄諸野。馬牛避弗踐。鷺鷥以羽覆之。母乃收而養之。長為高僧。即圭峰禪師也。宋書百濟國出自索離國。其王出行。其侍兒於後妊娠。王還欲殺之。侍兒田前見天上有氣如大鷄子來降。感故有娠。王捨之。後生男。王置之豕牢。豕以口氣噓之。不死。後徙於馬關。亦如之。王以為神。命養之。名曰東明。及長。善射。王惡而欲殺之。東明乃奔走。南至淹滯水。以弓擊水。魚鼈皆為橋。乘之得渡。至夫餘而王焉。

人有不從產門出者。世本云。陸終氏娶鬼方氏之妹。謂之女嬀。是生六子。孕三年。啟其左脇。三人出焉。破其右脇。三人出焉。修己背拆而生禹。簡狄胃拆而生契。魏志云。黃初六年。魏郡太守孔羨表言汝南屈雍妻王氏。以去年十月十二日生男兒。從右

腋下小腹上而出。其母自若。無他畏痛。今瘡已愈。母子全安。異苑云。晉義熙中。魏興李宣妻樊氏懷妊過期不生。而額上有瘡。兒從瘡出。長為將軍。名胡兒。又云。晉時常山趙宣母妊。身如常。而髀上作痒。搔之成瘡。兒從瘡出。母子平安。太康中。馬耆國王龍安遣子入侍。安妻妊娠十二月。剖脇生子。名曰會。後嗣為王。廣五行記云。李勢末年。涪陵民馬氏婦妊。從脇生子。母無恙。宋武帝時。武陵楊歡妻妊女。從股中生。至齊猶在。後魏肅宗熙平二年。并州祈縣人韓僧真女令姬。從母右脇而出。靈太后命付掖庭。野史云。莆田尉舍之左。有市人妻生男。從股髀間出。瘡合。母子無恙。浮屠氏言。釋迦生下摩耶之右脇。神仙傳言。老子生時。剖母左腋而出。嵩高記云。陽翟有婦人妊三十月。乃生子。從背出。五歲便入山學道。為母立祠。曰開母祠。瑯琊抄云。成化中。宿州一婦孕。脇腫如癰。及期兒從癰出。瘡痛隨合。其子名佛記兒。又成化十八年三月。宿州民張真妻王氏孕。當產。臍下右邊痛不可言。歷三月。腹右畔開裂。產出一男。鼻準中有黑痣。嘉靖四十年三月。真定一婦人。於右脇下產一男。甚雄偉。六歲而死。又隆慶五年二月。唐山縣民婦有孕。左脇腫起。兒從脇生。俱無恙。甲辰徐州一婦脇骨生一肉瘤。漸長如核。大皮益瑩薄。彌月兒從此產。

人生三子四子者甚多。王冰玄珠密語云。人生三子。主太平。人生三女。國淫失。人生十子。諸侯競位。人生肉塊。天下饑荒。雖有此說。然從來未聞有一生十子者。按後漢方術傳云。南昌有婦。人生四子。劉祇以問唐檀。檀以為京師當有兵氣。其禍發於蕭牆。此或一時之占驗。未必為定論也。唐哀帝時。潁州汝陰縣彭文妻。一產三男。宋至道三年。南劍民劉相妻。一產三男。永樂六年。山西靈丘縣民李天秀妻朱氏。一產三男。萬歷元年。沙縣民黃壽妻。一產三子。續已編。汝寧士燕生者。妻一乳三男。吳陸鍾知光州時。過其家。生呼三男出。皆髻秀。其髻一向左。一向右。一在中。以貌類難別。故髻以識之。他日生率三子來州謁見。云。聞此有一乳三女者。與兒同年。欲求為配。陸奇之。為議而聘焉。石勒僭位三年。黎陽人陳武妻。一產三男一女。勒以為祥。賜乳婢一口。穀一百石。雜綵四十疋。拓跋魏高祖延興三年秋。秀容郡婦人。一產四男。四產十六男。唐永徽六年。淄州高苑民吳威妻。嘉州民辛道護妻。寶歷二年十二月。延州人賀文妻。皆一產四男。宋太平興國七年。鴈門縣民劉習妻。產四男。祥符元年。高郵軍民王言妻。產四男。八年。永嘉縣民張保妻。產四男。元至元二十年二月。高州民張丑妻李氏。一產四子。三男一女。大德元年十一月。遼陽打鴈字蘭奚戶那懷妻和

里達一產四男。十年正月。江州湖口縣民方丙妻甘氏一產四男。致和元年。當塗縣楊泰妻吳氏一產四子。嘉靖十一年。當塗縣民吳倫妻一產三男。一女。萬歷年間。大同民一產四男。三十六年十一月二十二日。福州東門守軍蘇九郎妻鄭氏一產二男。二女。侯甸西樵野記載天順間。揚州民家一產五男。體貌無異。無一夭者。母亦無恙。陸聚庚已編載武進人張麻妻一產五男。成化間。嘉善縣蘇亮妻初乳生三子。再乳生四子。三乳生六子。萬歷庚寅。宿州村民婦一產七子。膚髮紅白黑青諸色各異。以為妖也。潛屬一人瘞之江滸。里有富長者。夜夢神謂曰。明日有七將軍在阨。過爾門。宜救之。當獲福佑。長者起覘門外。果見所識人抱一筐。衣覆其上。發視之。問知其由。以錢勞之。語曰。是兒神已托夢於我。我當鞠之。爾但歸報已瘞。勿泄也。越三年。婦老竟無子。頗聞育在富長者家。訪得之。屬人懇求。長者曰。神以兒屬我。安有還理於。是與見而兩家並子之焉。嘉靖六年。河間民李公寓婦陳氏一產七女。○弇山堂記。戊午舉人顧合璧聯璧。其父四舉胎八子。與周八士同。○獨異志。淮南程幹。本富人。二年間為水火蕩盡。妻茅氏連八年孳生十六子。相持行乞於市。○宋乾道年。潮州城西婦。孕過期。產子如指大。五體皆具者百餘。蠕蠕能動。

男人有生子者。宋史云。宣和六年。都城有賣青果男子。孕而生子。尊母不能收。易七人始婉而逃去。西樵野記云。嘉靖乙酉。橫涇傭農孔方。忽患膨脹。憤憤幾數月。自脇產一肉塊。剖視之一兒。肌體毛髮悉具。周文襄忱撫姑蘇時。有報男子生子者。周不答。但目諸門子曰。汝輩慎之。萬歷丁巳正月二十八日。寧波府奉化縣後陽村男子張一。產兒自穀道出。一與同村盧某負販出。往托宿。必與俱。若夫婦然。兒之孕。似盧為之父。

人有生於獸者。史記秦孝公二十一年。有馬生人。異苑云。漢末有馬生人。名曰馬異。及長。亡入胡地。漢靈帝光和元年。司徒長史馮巡馬生人。風俗通曰。巡馬生胡子。問養馬胡蒼頭。乃奸此馬以生子。梁時有村人翰文秀。見一鹿產一女子。在地遂收養之。及長。與凡女有異。遂為女冠。梁武帝為別立一觀。號曰鹿娘。後死入棺。武帝致祭。開棺視之。但聞異香。不見骸骨。蓋尸解也。遂葬棺於毘陵。因號其葬處為真山。在今江陰東一十八里。唐乾符二年。河北馬生人。中和元年九月。長安馬生人。秦州治東四十里天目山。仙人王治。隱居於此。有五色鹿。產一女於山左草莽間。聞啼聲往視之。見鹿乳焉。治挈養於菴。至七歲。為築鹿女臺居之。治飛昇後。女欲南渡。邑人餞之。

江浦云後百年復來履江水而去。景雲二年十一月山忽鳴聲聞遠近。會敕遣天台山女道士王妙行。行天下名山大川。洞天福地。投金龍玉璧。王妙行即鹿女。計百年矣。西廡志云。西羌之先。為木渾可汗子孫。乃狼種也。隋書突厥之先。國於西海之上。為鄰國所滅。只留一小兒。與牝狼交。狼有孕。兒復被殺。狼逃至高昌之西北。後生十男。其一姓阿史那氏。最賢。遂為君長。

人有生於竹木者。漢時夜郎女子。浣溪上。有三節竹。流至足間。聞嬰兒聲。剖竹得男。收養之。及長。自稱夜郎王。以竹為姓。隋時黎陽人王德祖。撤其皮。見一孩。抱胎而出。因收養之。至七歲。問誰育我。具以實告。因林木而生。名曰梵天。後改梵志。作詩諷人。甚有義旨。蓋菩薩示化也。劉宋時。東陽鎮朱氏。聞木巢中兒啼。收育之。後為高僧。即寶誌公也。

凡物九竅者胎生。八竅者卵生。而人又有生於卵者。博物志。徐君宮人娠而生卵。以為不祥。棄之水濱。有犬名曰鵠倉。獵於水側。銜歸。獨孤母以為異。覆煖之。遂跽生兒。生時正偃。故以為名。徐君宮中聞之。乃更錄取。長而仁智。襲君徐國。即徐偃王也。後鵠倉臨死。生角而九尾。實黃龍也。尸子云。徐偃王有筋無骨。平陽志。晉永嘉中有韓

媼者。偶拾巨卵。歸育之。得嬰兒。字曰撫。方四歲時。劉淵築平陽城。不就。募能城者。概因變為蛇。令媼舉灰誌後。曰。憑灰築城。可立就。果然。淵怪之。遂投山穴間。露尾數寸。忽有泉湧出。成池。後人名為金龍池。在府城西南。雷州志。陳時民陳氏。獲一卵。圍及尺餘。攜歸。忽一日雷震而開。生子。有文在左手曰雷。在右手曰州。及長。名文玉。陳大建三年。拜本州刺史。多善政。沒而神靈。立廟以祀。名雷公廟。在府城西南。瓊州志。建安縣南四百里五指山。一名黎母山。一云婺女星見此山。因名黎婺。後訛呼黎母。黎母廟在府城西。舊傳雷攝一卵在山中。生一女。歲久有交趾蠻過海採香者。因與成婚。子孫甚衆。是為黎母。乃黎人之祖也。故郡建廟祀之。唐時南詔洱海邊。漁者得雕卵。破得嬰兒。乳之長成人。稱為宗摸師。能以符咒化水土為酒食。千百人皆醉飽。一日化為雕。飛集高興寺。不知所止。高興寺在玉案山崇福寺之北。今屬賓川州。宋書。高句麗其先出夫餘。王嘗得河伯女。因閉於室內。為日所照。引身避之。日影又逐。既而有孕。生一卵。大如五升。夫餘王棄之。與犬。犬不食。與豕。豕不食。棄於路。牛馬避之。棄於野。象鳥以毛茹之。王剖之。不能破。遂還其母。母以物裹置煖處。有一男破而出。及長。字之曰朱蒙。其俗言朱蒙者。善射也。夫餘之臣謀殺之。朱蒙走至紇升骨城。遂